



REPUBLIKA E SHQIPËRISË
KOMISIONI QENDROR I ZGJEDHJEVE
KOMISIONERI SHTETËROR I ZGJEDHJEVE

Data: 05.11.2024

Nr: 192

Ora: 12:00

VENDIM

PËR

**MIRATIMIN E PROGRAMIT PËR TRAJNIMIN DHE MONITORIMIN E
ADMINISTRATËS ZGJEDHORE DHE TË DISA AKTORËVE TË TJERË PËR
ZGJEDHJET PËR KUVEND 2025**

Në mbështetje të nenit 19, pikat 1, shkronja “b” e “gj”, e 2, të ligjit nr.10019, datë 29.12.2008 “Kodi Zgjedhor i Republikës së Shqipërisë”, të ndryshuar, Komisioneri Shtetëror i Zgjedhjeve

VENDOS:

1. Miratimin e programit për trajnimin dhe monitorimin e administratës zgjedhore dhe të disa aktorëve të tjerë, për zgjedhjet për Kuvend 2025, sipas tekstit që i bashkëlidhet këtij vendimi.
2. Ky vendim hyn në fuqi menjëherë dhe publikohet në faqen zyrtare të internetit të Komisionit Qendror të Zgjedhjeve.
3. Kundër këtij vendimi mund të bëhet ankim në Komisionin e Ankimimeve dhe Sanksioneve, brenda 30 (tridhjetë) ditëve nga shpallja e tij.

Komisioneri Shtetëror i Zgjedhjeve

Ilirjan CELIBASHI

PROGRAMI
PËR
TRAJNIMIN DHE MONITORIMIN E ADMINISTRATËS ZGJEDHORE DHE TË DISA
AKTORËVE TË TJERË PËR ZGJEDHJET PËR KUVEND 2025

I. Qëllimi dhe parimet

1. Trajnimet e administratës zgjedhore dhe aktorëve të tjerë të përfshirë në zgjedhje organizohen nga KQZ, përmes trajnerëve të rekrutuar prej saj.
2. Trajnerët do të trajnohen dhe certifikohen nga KQZ sipas kurrikulës për certifikimin e trajnerëve e cila përmban:
 - a. Kurrikulën për trajnimin e KZAZ;
 - b. Kurrikulën për trajnimin e sekretarëve të KZAZ dhe operatorëve në VNV për nxjerrjen dhe transmetimin e rezultateve;
 - c. Kurrikulën për trajnimin e KQV;
 - d. Kurrikulën për trajnimin e GNV;
 - e. Kurrikulën për trajnimin e operatorëve PEI;
 - f. Kurrikulën për trajnimin e operatorëve PEVN;
 - g. Kurrikulën për trajnimin e monitoruesve të fushatës zgjedhore.
3. Organizimi i trajnimeve udhëhiqet nga parimi i transparencës, meritokracisë dhe trajtimit të barabartë për situata objektive të njëjta.

II. Metodologjia e realizimit të trajnimeve

1. Metoda e trajnimit "Kaskadë" dhe "ekipe të lëvizshme" përfshin këto faza:
 - a) Faza e parë përfshin shqyrtimin e aplikimeve dhe përmbushja e kriterëve për trajner. KQZ bën vlerësimin me dosjet e depozituara në aplikim nga kandidatët për trajner.
 - b) Faza e dytë përfshin trajnimin e kandidatëve për trajnerë nga KQZ dhe vlerësimin e tyre për cilësitë e trajnerit dhe aftësitë teknologjike. Kandidatët për trajnerë që vlerësohen pozitivisht konsiderohen trajnerë.
 - c) Faza e tretë përfshin trajnimin dhe certifikimin e trajnerëve të përzgjedhur nga faza e dytë. Trajnimi është i detajuar për secilin prej proceseve zgjedhore. Trajneri që vlerësohet pozitivisht për secilën kurrikul trajnimi konsiderohet trajner i certifikuar dhe i aftë për të zhvilluar trajnime për zgjedhjet për Kuvend 2025. Trajnerët e certifikuar trajnojnë në nivel njësie vendore (Bashki) dhe/ose njësie administrative, sipas skemës të përgatitur nga KQZ, target grupet e mëposhtme:
 - i) administratën zgjedhore përkatësisht KZAZ, KQV, GNV,
 - ii) operatorët PEI, operatorët PEVN,
 - iii) monitoruesit e fushatës zgjedhore
 - iv) sekretarët e KZAZ dhe operatorët në VNV për nxjerrjen dhe transmetimin e rezultatit të zgjedhjeve.

2. Drejtoria e Administratës Zgjedhore (DAZ), përmes Sektorit të Dokumentacionit Zgjedhor dhe Trajnimeve (SDZT), organizon dhe koordinon trajnimin e kandidatëve për trajnerë si dhe trajnimin dhe certifikimin e trajnerëve.
3. Në trajnimin dhe certifikimin e trajnerëve, Drejtoria e Administratës Zgjedhore dhe Sektori i Dokumentacionit Zgjedhor dhe Trajnimeve angazhojnë, sipas nevojave, trajnerë profesionistë. Angazhimi i trajnerëve profesionistë bëhet vetëm për trajnimin e certifikimin e trajnerëve për kurrikulën e administratës zgjedhore (KZAZ, KQV, GNV). Trajneri profesionist angazhohet edhe në hartimin e moduleve apo në mësimdhënie video regjistrim përmes platformës e-learning sipas kërkesave të KQZ. Trajnerët profesionistë mund të përfshihen në trupën e trajnerëve të certifikuar për zgjedhjet për Kuvend 2025 vetëm pasi të ndjekin dhe të certifikohen për kurrikulat e operatorëve PEI, PEVN dhe monitoruesit e fushatës zgjedhore.
4. Trajnerët profesionistë duhet të kenë formim universitar së paku të ciklit të dytë dhe të kenë një përvojë në mësimdhënie jo më pak se 10 vjet në institucionet e arsimit të lartë apo të angazhuar si trajner nga organizatat e njohura vendase apo ndërkombëtare, mundësisht me një eksperiencë si trajner i trajnerëve në proceset zgjedhore të mëparshme. Preferohen trajnerë profesionistë të certifikuar nga KQZ si të tillë. Vlerësimi i trajnerëve profesionistë kryhet nga DAZ përmes përmbushjes së kritereve si dhe intervistës për këtë qëllim.

III. Sektori i Dokumentacionit Zgjedhor dhe Trajnimeve

1. DAZ përmes SDZT zbaton parashikimet e përcaktuara në këtë akt dhe kryen, në funksion të trajnimeve, këto detyra:
 - a) Angazhohet për organizimin dhe koordinimin e trajnimeve të kandidatëve për trajnerë si dhe certifikimin e trajnerëve.
 - b) Harton skemën e zhvillimit të trajnimeve të KZAZ, KQV, GNV apo edhe kalendarin rezervë sipas nevojave.
 - c) Propozon zgjidhje të cilat tejkalojnë parashikimet në këtë akt për problematikat e shfaqura në periudhën zgjedhore, brenda parashikimeve buxhetore të KQZ.
 - d) Harton, për administratën zgjedhore, kurrikulat e trajnimeve, modelet e pyetësorëve për vlerësimin e trajnimeve apo modelet e raportimeve.
 - e) Administron raportet përfundimtare të trajnerëve, për administratën zgjedhore.
 - f) Harton materiale ndihmëse në funksion të trajnimeve të administratës zgjedhore.
 - g) Koordinon, sipas nevojave dhe planifikimeve të strukturave të tjera në KQZ, angazhimin e trajnerëve të certifikuar në trajnimin e punonjësve të administratës së pushtetit qendror e vendor, monitoruesve të fushatës zgjedhore, operatorëve PEI dhe operatorëve PEVN.
 - h) Vlerëson nevojën e rishikimit të moduleve ekzistente apo moduleve të reja për administratën zgjedhore (KZAZ, KQV, GNV) dhe angazhon trajnerët profesionistë për rishikimin apo hartimin e tyre.
2. Trupa e trajnerëve që do të angazhohen në zgjedhjet për Kuvend 2025 do të përbëhet nga 78 trajnerë të certifikuar. Trajnerët e certifikuar do të ndahen në trajnerë afatgjatë dhe trajnerë afatshkurtër, në varësi të kohës së rekrutimit të tyre nga KQZ.
3. SDZT u kërkon bashkive për të përcaktuar mjediset e përqëndruara si dhe mjediset e tjera të nevojshme për zhvillimin e trajnimeve, sipas afateve të përcaktuara dhe standardeve e kritereve logjistike, për organizimin e trajnimeve. Në rast se bashkitë nuk mundin të ofrojnë mjediset e përqëndruara, trajnimi të zhvillohet në mjediset që bashkitë propozojnë. Në rast se

këto mjedise nuk plotësojnë kriteret, KQZ merr mjedise me qera (mundësisht në objekte publike) për organizimin e trajnimeve.

4. Në funksion të zbatimit të detyrave operacionale për realizimin e trajnimeve të administratës zgjedhore, Sekretari i Përgjithshëm shqyrton dhe miraton aktet apo dokumentacionin e vënë në dispozicion të tij nga DAZ.

IV. Detyra të strukturave të tjera në KQZ

1. Drejtoritë në KQZ që mbulojnë PEI, PEVN dhe monitoruesit e fushatës zgjedhore kryejnë këto detyra:
 - a. Hartojnë kurrikulat për trajnimin e operatorëve PEI, operatorëve PEVN si dhe kurrikulën për monitoruesit e fushatës zgjedhore si dhe modelet e pyetësorëve për vlerësimin e trajnimeve apo modelet e raportimeve.
 - b. Trajnojnë dhe certifikojnë trajnerët që do të angazhohen në zgjedhjet për Kuvend 2025 për kurrikulën e PEI, PEVN dhe monitoruesit e fushatës zgjedhore.
 - c. Organizojnë trajnimin e operatorëve PEI, PEVN dhe monitoruesit e fushatës zgjedhore dhe hartojnë skemën dhe kalendarin e trajnimeve të tyre.
 - d. Përcaktojnë mjediset e organizimit të trajnimeve për operatorët PEI, PEVN dhe monitoruesit e fushatës zgjedhore si dhe përgatisin bazën materiale respektive për organizimin e trajnimeve për kategoritë e sipërcituara.
 - e. Administrojnë respektivisht raportet përfundimtare të trajnerëve, për operatorët PEI, PEVN dhe monitoruesit e fushatës zgjedhore.
 - f. Bashkëpunojnë me SDZT duke vënë në dispozicion të saj kalendarin e trajnimeve të grupeve të sipërcituara dhe kërkojnë nga SDZT trajnerët e certifikuar sipas kalendarit të hartuar prej tyre.
 - g. Ndjekin dhe mbikëqyrin trajnimet e operatorëve PEI, PEVN dhe monitoruesit e fushatës zgjedhore dhe mbajnë kontakte me trajnerët përkatës për zgjidhjen e problematikave të ndryshme.
 - h. Për efekt të pagesës së trajnerëve të certifikuar, përlllogarisin orët e trajnimeve të secilit trajner për kategoritë që mbulojnë dhe një kopje të këtij materiali ia dërgojnë SDZT.

V. Kriteret e rekrutimit të kandidatëve për trajnerë

1. Kriteret që duhet të përmbushë kandidati që aplikon për trajner janë:
 - a) Formimi universitar i ciklit të parë apo të dytë sipas legjislacionit të arsimit të lartë, në fushën e përcaktuar në njoftimin për shprehjen e interesit të publikuar nga KQZ në faqen zyrtare të saj;
 - b) Përvojë në mësimdhënie në institucionet e arsimit të lartë apo në institucionet parauniversitare të arsimit parauniversitar, apo i angazhuar si trajner nga organizatat e njohura vendase apo ndërkombëtare, mundësisht me një eksperiencë si trajner në proceset zgjedhore të mëparshme;
 - c) Aftësi në menaxhim, koordinim dhe raportim si dhe njohje të programeve kompjuterike;
 - d) Të jetë i paangazhuar në struktura drejtuese qendrore e vendore të partive politike dhe të mos ketë patur aktivitete të deklaruar publik në fushatë zgjedhore ose aktivitetin politik të një subjekti zgjedhor;

- a) Të mos jetë në detyrë në strukturat e organeve të Policisë së Shtetit, Gardës së Republikës, inspektorati qendror apo lokal, ushtarak aktiv i Forcave të Armatosura, punonjës i Shërbimit Informativ, organeve të pushtetit gjyqësor;
 - b) Të mos jetë i dënuar me vendim gjyqësor të formës së prerë;
 - c) Të mos jetë i dënuar administrativisht për shkelje të dispozitave, të cilat lidhen me zgjedhjet, apo të mos ketë masë disiplinore në fuqi në shërbimin civil;
 - d) Preferohen kandidatët të cilët janë banorë të bashkisë/njesisë administrative në të cilën aplikojnë.
2. Në thirrjen për aplikim përcaktohen dokumentet, vërtetimet apo deklaratimet që kandidatët duhet të depozitojnë në aplikimin e tyre.

VI. Procedurat për aplikimin e kandidatëve për trajnerë

1. KQZ, për rekrutimin e kandidatëve për trajnerë, publikon në faqen e saj zyrtare të internetit “thirrje për aplikim”.
2. Thirrja për aplikim specifikon llojin e trajnerit që KQZ ka nevojë. Ka dy lloje trajnerësh:
 - a) Trajner afatgjatë
 - b) Trajner afatshkurtër
3. Afati në thirrjen për aplikim të lihet së paku 15 (pesëmbëdhjetë) ditë nga publikimi i thirrjes.
4. Thirrja për aplikim të përmbajë informacionin e mëposhtëm:
 - a) Numrin e trajnerëve të certifikuar që KQZ ka nevojë sipas bashkive;
 - b) Fazat e vlerësimit për t’u bërë trajner;
 - c) Profilin/fushën e studimit si dhe njësinë administrative/bashkinë/qarkun për të cilat është hapur thirrja;
 - d) Informacion mbi shërbimin e kërkuar;
 - e) Kriteret dhe dokumentacionin e nevojshëm të aplikantit;
 - f) Mënyrën e aplikimit dhe afatet e aplikimit.
5. Aplikimet të bëhen online në linkun përkatës të publikuar nga KQZ në faqen e saj zyrtare.

VII. Vlerësimi i aplikimeve të kandidatëve për trajnerë

1. Dosjet e aplikantëve, kandidatë për trajnerë, si dhe dokumentacioni i tyre shqyrtohen nga DAZ brenda 7(shtatë) ditëve nga dita e fundit për depozitimin e aplikimeve.
2. Aplikimet e kandidatëve që përmbushin kriteret dhe disponojnë dokumentacionin përkatës kualifikohen nga KQZ edhe pse numri i aplikimeve mund të jetë më i madh se nevoja që KQZ ka deklaruar.
3. KQZ përmes DAZ, pikëzon, dosjet e aplikantëve dhe i rankon ato duke filluar me kandidatin me më shumë pikë dhe vijuar me rend zbritës, të ndarë për çdo bashki.
4. Pikëzimi i aplikimeve mbështetet në nivelin e diplomës, përvojën në mësimdhënie në institucionet e arsimit të lartë apo në institucionet parauniversitare të arsimit parauniversitar, eksperiencën në fushën e trajnimit, eksperiencën e tyre në trajnimin me të rriturit, eksperiencën të suksesshme të mëparshme në procese zgjedhore.
5. KQZ organizon një trajnim 1 ditor në mjediset e KQZ sipas një kalendari të hartuar prej saj me ndarjen e tyre në grupe. Në përfundim të trajnimit, kandidatët zhvillojnë testimin dhe kalimi me sukses i këtij testimi i konsideron ata trajnerë. Trajnimi dhe testimi konsiston në vlerësimin e tyre për cilësitë e tyre si trajner, aftësitë e tyre teknologjike.

6. Trajnerët e përzgjedhur në këtë fazë mund ta kalojnë numrin e nevojshëm të trajnerëve që do të angazhohen në procesin zgjedhor por në çdo rast numri i përfshirë do të jetë brenda planifikimit buxhetor të miratuar për këtë qëllim.
7. KQZ, përmes SDZT, njofton trajnerët e përzgjedhur për trajnimin që duhet të kryejnë.
8. Pjesëmarrja e rregullt në trajnim është e detyrueshme. Për këtë KQZ lidh kontratë me secilin prej trajnerëve të përzgjedhur. Pagesa e tyre fillon që prej lidhjes së kontratës.
9. Kur për shkaqe të ndryshme, numri i trajnerëve të përzgjedhur është nën numrin e nevojshëm të kërkuar nga KQZ, SDZT plotëson numrin e nevojshëm duke iu referuar rankimit të kryer. Kandidatët njoftohen për të kryer një trajnim të përsheptuar vetëm mbi tematikën për të cilën ata do të angazhohen. Pas shterimit të kësaj liste, Sektori i Dokumentacionit Zgjedhor dhe Trajnimeve, për plotësimin e numrit të nevojshëm i referohet regjistrin të trajnerëve të viteve të mëparshme. Në të gjitha rrethanat edhe këta trajnerë duhet të kryejnë trajnimin.

VIII. Trajnerët e certifikuar

1. Trajnimi organizohet në sesione. Çdo sesion për trajnimin e certifikimin e trajnerëve zgjat 3 orë. Në çdo ditë zhvillohen jo më shumë se dy sesione.
2. Trajnimi dhe certifikimi i trajnerëve do të organizohet me ndarjen e tyre në grupe. SDZT organizon ndarjen e trajnerëve në jo më shumë se 5 grupe.
3. Kohëzgjatja e trajnimit për çdo grup trajnimi është 8 ditë përkatësisht 5 ditë për kurrikulën e administratën zgjedhore, dhe nga 1 ditë për kurrikulën e monitoruesve të fushatës zgjedhore, operatorët PEI dhe operatorët PEVN. SDZT harton kalendarin e trajnimeve për çdo grup.
4. Trajnerët certifikohen për secilën nga kurrikulat. Për certifikimin e tyre përgjatë trajnimit vlerësohen maksimalisht me 70 pikë për aktivizimin e tyre, prezantimet dhe punët e kryera dhe me 30 pikë për testimin me shkrim.
5. Trajnimi konsiderohet i kaluar me sukses kur kandidati vlerësohet me së paku 70% të pikëve për aktivizimin e tyre, prezantimet dhe punët e kryera si dhe 50% të pikëve të testimit me shkrim. Trajnerët që kalojnë me sukses certifikimin në secilën kurrikul konsiderohen trajnerë të certifikuar. Trajnerët e certifikuar bëhen pjesë e bazës së të dhënave në KQZ.
6. Sektori i Dokumentacionit Zgjedhor dhe Trajnimeve, duke respektuar renditjen, komunikon me trajnerët përkatës, sipas nevojës për trajnerë/për bashki dhe i njofton ata për të nënshkruar kontratën e shërbimit si trajnerë të certifikuar.
7. DAZ vlerëson nëse trajnimi mund të realizohet i drejtpërdrejtë sipas kërkesave në kushte normale, trajnim online apo i kombinuar.

IX. Detyrat e trajnerëve

1. Trajneri i certifikuar, i kontraktuar nga KQZ respekton përcaktimet dhe urdhërimet e KQZ.
2. Për administratën zgjedhore
 - a. Për trajnimin e administratës zgjedhore:
 - i. Trajneri i certifikuar do të kryejë trajnimet në mjediset e qendrave të trajnimeve të cilat do të jenë të disponueshme, sipas një kalendarit të hartuar nga vetë trajneri, përgjatë periudhës së përcaktuar nga KQZ për kryerjen e trajnimeve.
 - ii. Për trajnimin e KQV, trajneri koordinon me KZAZ përkatëse dhe në bashkërendim me to, përcakton oraret e trajnimeve për komisionerët e qendrave të votimit.

- iii. Trajneri do të hartojë planin e trajnimit ku përcaktohet vendi, orari dhe të dhëna mbi anëtarët e KZAZ-ve, KQV-ve apo GNV-ve që do trajnojnë, sipas qendrave të caktuara nga KQZ.
 - iv. Plani i trajnimit i dërgohet Komisionit Qendror të Zgjedhjeve dhe në rast se KQZ nuk e refuzon atë brenda 24 orëve, atëherë plani i trajnimit konsiderohet i miratuar.
 - v. Koha/orari i planifikuar për zhvillimin e trajnimeve duhet të jetë fleksibël duke bërë që anëtarët e KQV-ve apo GNV-ve, të kenë mundësi zgjedhjeje për ndjekjen e trajnimeve.
 - vi. Plani i trajnimit, për aq sa është e mundur, të organizohet në mënyrë të tillë që kryetarët dhe sekretarët të grupohen bashkë.
 - vii. Trajneri i certifikuar zhvillon trajnimin vetëm nëse prezent janë jo më pak se 5 persona.
- b. Për monitorimin e administratës zgjedhore:
- i. Trajneri do të kryejë detyra monitoruese të veprimtarisë së administratës zgjedhore të trajnuar nga vetë ata si dhe qendrat e votimit apo mjediset e KZAZ-ve për plotësimin e kushteve në të cilat administrata zgjedhore kryen detyrat e saj.
 - ii. Monitorimi do të kryhet vetëm me kërkesë të Komisionit Qendror të Zgjedhjeve dhe në bazë të planifikimit të detyrave nga struktura përkatëse.
 - iii. Komisioni Qendror i Zgjedhjeve do të pajisë trajnerët me dokumentin përkatës për ushtrimin e detyrës së tyre sipas këtij funksioni.
- c. Për raportimin e trajnerëve për administratën zgjedhore:
- i. Të gjithë trajnerët, për çdo trajnim të kryer, sipas planit të trajnimit, raportojnë online, periodikisht, në kohë reale në KQZ, përmes linkut që KQZ u dërgon atyre ose në mungesë të tij, në mediumet e komunikimit elektronik.
 - ii. Pas përfundimit të procesit të trajnimit me të trajnuarit respektivë sipas planit të trajnimeve, trajnerët hartojnë raportin përfundimtar.
 - iii. DAZ vlerëson raportin përfundimtar të trajnerit dhe mbi bazën e tij dhe dokumentacionit shoqërues bën përlllogaritjen e angazhimit të trajnerit.
3. Për trajnimet që trajneri i certifikuar kryen për operatorët PEI, operatorët PEVN dhe monitoruesit e fushatës zgjedhore zbaton kalendarin e dërguar nga KQZ.
4. Trajnimi i monitoruesve të fushatës zgjedhore dhe trajnimi i administratës publike të qeverisjes vendore do të kryhet në nivel qarku.
5. Trajnerët e certifikuar mund të angazhohen në trajnime të tjera sipas thirrjeve që KQZ publikon në varësi të nevojave të saj.

X. Aspekte financiare

1. KQZ lidh kontratë shërbimi me trajnerët profesionistë që do të angazhohen në trajnimin e certifikimin e trajnerëve. Vlera e pagesës për orë trajnimi për trajnerët profesionistë është 1500 (njëmijë e pesëqind) lekë për trajnimin e certifikimin e trajnerëve sipas përcaktimeve në këtë akt, apo në mësimdhënie video regjistrim përmes platformës e-learning sipas kërkesave të KQZ.
2. Masa e pagesës së plotë për hartimin e kurrikulave apo të materialeve të trajnimit nga trajnerët profesionistë, të nevojshme për zhvillimin e 6 orëve 60-minutëshe trajnimi të jetë 12 000 (dymbëdhjetë mijë) lekë, ndërsa për më pak se 6 orë pagesa të llogaritet në përpjesëtim me

- çmimin për orë trajnimi. Rishikimi i materialeve ekzistente të KQZ ka një vlerë deri në 50% të pagesës së plotë. Hartimi i materialeve të tilla bëhet me kërkesë të KQZ.
- Trajnerët të cilët përzgjidhen për të ndjekur trajnimin 8 ditor të KQZ lidhin kontratë me KQZ. Pagesa e tyre për një ditë trajnimi është 2000 lekë.
 - KQZ lidh me trajnerët e certifikuar kontratën individuale të shërbimit.
 - Në kontratë parashikohet pagesa si trajner i certifikuar, në bazë të orëve të realizuara
 - Kohëzgjatja e trajnimit do të jetë 4 orë për anëtarët e KZAZ, 2 orë për GNV apo KQV ndërsa për kryetarë dhe sekretarë të KQV-ve 4 orë. Kohëzgjatja e trajnimit për monitoruesit e fushatës zgjedhore është 3 orë, ndërsa kohëzgjatja e trajnimit për operatorët PEI dhe operatorët PEVN është respektivisht nga 3 orë.
 - Vlera e pagesës për një orë trajnimi për kategorinë e trajnerëve është 750 (shtatëqind e pesëdhjetë) lekë, ndërsa për një orë monitorimi është 300 (tremijë) lekë.
 - Në rastet kur trajneri nuk kryen trajnimin për shkak të mungesës së numrit minimal të pjesëmarrësve të kërkuar, pagesa e tij do të jetë 300 lekë.
 - Pagesa e trajnerit të certifikuar kryhet pas shqyrtimit të dokumentacionit të dorëzuar nga ai në KQZ për përmbushjen e realizimit të numrit total të orëve dhe detyrimeve të tjera.
 - Trajnerët e certifikuar, në përfundim të të gjithë trajnimeve, sipas planit të trajnimit, dorëzojnë në KQZ:
 - Planin e trajnimit;
 - Raportet përkatëse të zhvillimit të çdo trajnimi sipas formateve tip të dërguara nga KQZ;
 - Listprezencën e nënshkruar nga pjesëmarrësit në çdo trajnim të kryer;
 - Fletëtestimet e pjesëmarrësve (vetëm për KZAZ);
 - Raportin përfundimtar.

XI. Monitorimi i trajnimeve nga KQZ

- Monitorimi i vlerësimit të trajnimeve të administratës zgjedhore bazohet në planin e trajnimeve që trajnerët kanë depozituar në KQZ.
- DAZ i propozon Sekretarit të Përgjithshëm listën e vendndodhjeve që vlerëson, që duhet monitoruar sipas një përzgjedhje rastësore apo në bazë të problematikave të raportuara dhe, pas miratimit tij, ushtron monitorimin në vendin e përcaktuar.
- Grupet monitoruese hartojnë raportet e monitorimit të cilat depozitohen tek Sekretari i Përgjithshëm i KQZ-së.
- KQZ ndërpret kontratën me trajnerët e çdo kategorie nëse ai:
 - zhvillon module trajnimi që nuk përkojnë me atë të miratuar nga KQZ;
 - nuk respekton normat dhe rregullat e etikës;
 - nuk përdor materialet e trajnimit për zhvillimin e modulit;
 - nuk njofton ndryshimin e planit të trajnimit;
 - nuk paraqitet në vendin e trajnimit, sipas kalendarit të njoftuar.
- KQZ mbledh gjatë monitorimeve praktikatat e suksesshme, të cilat i shërbejnë për përmirësimin e punës në vijim.

XII. Vlerësimi i trajnimeve

- KQZ, për rritjen e cilësisë së trajnimeve, përcakton treguesit e performancës së trajnimit.

2. Treguesit e performancës sigurohen nga monitorimi i drejtpërdrejtë, nga informacioni i dërguar nga trajnerët në kohë reale dhe raporti përfundimtar, duke identifikuar:
 - a) Përqindjen e realizimit të planit të trajnimit duke analizuar përqindjen e prezencës së pjesëmarrësve në trajnim;
 - b) Përqindjen e kalueshmërisë së pjesëmarrësve në trajnim;
 - c) Përgatitjen e informacioneve në kohë reale dhe raportit përfundimtar;
 - d) Rezultatet e verifikimit paszgjedhor që dëshmojnë për mangësi domethënëse të respektimit të kërkesave të KQZ.
3. Cilësia e trajnimit do të evidentohet nga KQZ përmes monitorimeve të saj apo përmes shpërndarjes së sa më shumë pyetësorëve në administratën zgjedhore.
4. Treguesit e performancës së trajnuesit do të shërbejnë për vlerësimin e trajnerit në angazhimet e mëvonshme dhe kryesisht për përmirësimin në vazhdimësi të procesit të trajnimeve.

XIII. Kalendar i trajnimeve

Kalendar i trajnimeve për administratën zgjedhore dhe planifikimi i realizimit të tyre është respektivisht sipas lidhjes 1, bashkëlidhur këtij programi.

Planifikimi i realizimit të trajnimeve të administratës zgjedhore

Trajnimi	Trajnues të angazhuar	Koha e fillimit të realizimit të trajnimit	Nr komisione rëve zgjedhor që do të trajnohen	Nr. Ditëve që do të trajnohet trajnuesi (ToT)	Nr. Ditëve që do të trajnojë secili trajnues
Trajnimi i trajnerëve	78	Nëntor 2024 - janar 2025		5 grupe x 20 pjesmarrës (8 ditë secili grup)	
Trajnimi i anëtarëve të KZAZ-ve (pjesa e parë)	39	Një ditë pas konstituimit të tyre			1 - 2 ditë
Trajnimi i anëtarëve të KZAZ-ve (Pjesa e dytë)	39		736		1 - 2 ditë
Trajnimi i anëtarëve të KZAZ-ve (për zëvendësimet)	39	Sipas nevojës	Sipas nevojës		1 ditë
Trajnimi i anëtarëve të KQV-ve përfshirë vlerësimin e tyre nga trajnerët	78	2 javë para ditës së zgjedhjeve	25995 komisionerë		9 - 11 ditë
Trajnimi i kryetar + sekretar të KQV-ve përfshirë vlerësimin	78	5 ditë para ditës së zgjedhjeve	10398 komisionerë		2 - 4 ditë
Trajnimi i anëtarëve të GNV-ve	92	3 ditë para ditës së zgjedhjeve	3416		3 ditë